

بسم الله الرحمن الرحيم

الحمد لله رب العالمين والصلاة والسلام على أشرف المرسلين سيدنا محمد صلى الله عليه وعلى آله وصحبه وسلم ثم أما بعد

قال رسول الله صلى الله عليه وسلم

نضر الله امرا سمع منا حديثا فبلغه غيره ، فرب حامل فقه إلى من هو أفقه منه ، و رب حامل فقه ليس بفقيه ، ثلاث لا يغفل عليهن قلب مسلم : إخلاص العمل لله ، و مناصرة الأمر ، و لزوم الجماعة ؛ فإن دعوتهم تحيط من ورائهم و من كانت الدنيا نيته فرق الله عليه أمره ، و جعل فقره بين عينيه ، و لم يأت من الدنيا إلا ما كتب له ، و من كانت الآخرة نيته جمع الله أمره ، و جعل غناه في قلبه ، و أتته الدنيا و هي راغمة

**الراوي : زيد بن ثابت - المحدث : الألباني - المصدر : صحيح الترغيب - خلاصة حكم المحدث : صحيح**

إن شاء الله بإذن الله هنتكلم مع حضراتكم اليوم في موضوع يعتبر جديد لم يتم التطرق له قبل كذا ، وهو موضوع أنواع الحماية ، والإلتزامات المطلوبة مننا في لبس الكمامة أو زي ما سمينها كده " محاذير السلامة في ارتداء الكمامة "

**يعني إيه الكلام ده ؟؟**

يعني بنقول إن الكمامة اللي إحنا بنلبسها دي ممكن مفيدة ، وممكن أحيانا تكون ضارة زي أي شيء بالضبط لو استخدمناه في محله أو في غير محله

قبل ما نتكلم عن ال Mask ،

لأزم كنا نبقي متفقين على طرق العدوى في ال COVID ( أو الكورونا ) ، العدوى بتتم بثلاث طرق :

- droplet infection ( عن طريق إن العيان يكح أو يتف أو ينف ) ( الكحة ، التف ، النف ) ، وال droplet حجمها أكبر من خمسة ميكرون
- airborne ( دي مع الدكثرة والتمريض في الرعاية المركزة عن طريق الهواء ) عند تركيب أنبوبة ، توصيل على جهاز تنفس صناعي ، أخذ جهاز استنشاق موسع للشعب للمريض ، تشفيط عيان ، ودا حجم الجزيئات فيه بتكون أقل من خمسة ميكرون
- contact ( عن طريق اللمس ، عن طريق ملامسة T area ، اللي هي ال Mouth وال Nose وال ear ) ، ودي في الغالب بتحصل عن طريق إن إحنا بنلمس سطح عليه الفيروس ، والفيروس بعد كده بندخله بإيدينا إلى تجويف الصدر أو البطن

**الفيروس حجمه كام ؟؟**

حجمه من 0.06 ميكرون إلى 0.14 ميكرون

يعني يتنقل بال airborne أكثر وأسرع جداً ، ويتنقل بال droplet بردو بالعطس والتف والنف

**الفيروس بيموت بإيه ؟؟**

بالكحول ، والكحول

الكحول يموت علطول ، والكحول محتاج ربع ساعة

يموت بالشمس وبيموت بالحرارة ، لكن للأسف ممكن يحصل فيه نوع من التحور ويقاوم هذه الحرارة ودا موجود دلوقتي وشايفينه

**أنواع الكمامات اللي نعرفها ؟؟**

أول حاجة الكمامة العادية ( متصنعة من شركة قطونيل ) دي بيسموها close mask

الكمامة دي عشان تكون فعالة ونسبة الحماية بتاعتها لا تتجاوز ٦٧ في المية لا بد إنها تكون معمولة من 3 layers أو 4 layers

واحدة منهم على الأقل تكون شيفون ، ممكن يعاد استخدامه ويتغسل ويتنشف ويتحفظ بصورة سليمة

نوع ثاني اسمه surgical mask (القناع الواقي الطبي) الذي يكون لونه لوني زي ما حضراتكم بتشوفوه ، ومعظم الناس لابساه ، ودي بتدي حماية بنسبة ٧٥ في المية ، ودا لا يعاد استخدامه

بعد كده ،

حاجات اسمها respirator (هي دي الحماية الحقيقية) للي عايز يرتديها ، ودي مش معمولة للشعب إنه يرتديها ، دي الي يرتديها مقدمي الخدمة الطبية ، أو الناس الي هما على درجة عالية من الخطورة في التعرض للعدوى دا فيه منه نوعين :

- نوع عامله أمريكا ( اسمه national institute for occupational safety and health نويش ) الي فيه منه N95 ، N99 ، N100 ( يعني الماسك بيتدي بحرف ال N وينتهي برقم ) الحرف يا إما N ، يا إما R ، يا إما بي ، والرقم بيرمز إلى ال Percentage of filtered particles الي بتكون عدد الجسيمات الي بيتم فلترتها ( الي هي ثلاثة من عشرة ميكرون فما فوق ) ال N هو الي يهمننا ، وبيرمز non resistant to oil ، ال R << resistant to oil ال N 95 بيتدي حماية 95 في المية من الفيروسات والبكتيريا والطفيليات

- نوع عامله أوروبا ( الي هو FFP ) الي هي filtering face piece ودي في منها FFP 1 ، FFP 2 ، FFP 3 ال FFP1 دي بتدي حماية مقدارها ثمانين في المية P2 بتدي حماية مقدارها 94 في المية P3 بتدي حماية مقدارها 99.95 في المية

**عايز أقولك إيه ؟؟**

إن ال N95 من الأمريكي ، يعادل ال FFP2 من الأوروبي وال N100 من الأمريكي ، يعادل ال FFP3 من الأوروبي

خُذ بالك ،

الماسك الي بيلبسه هذا الطبيب أو مقدم الخدمة الطبية الي سميناه ال Respirator ( مش ماسك عادي ) ده فيه منه نوعين :

✓ نوع بصمام ( اسمه valved mask ) ( بيسهل النفس لأنه بيخلي الهواء يخرج وتأخذ النفس عن طريق الفيلتر ) لكن في نفس الوقت لو إنت كنت مصاب ممكن يعدي البيئة الي حواليك ( لا يستخدم إلا للمريض الي زي مريض القلب يقدر يأخذ النفس بسهولة )

✓ نوع بدون صمام ( non valved mask ) ( دا بيمنع نقل العدوى ) ودا الي بينصح بيه

مريض الي انت بتتعامل معاه وهيكون فيه نقل عدوى ، يبقى لازم يكون Non valved mask لأن لو إنت مصاب وال valve ده كان مفتوح ، يبقى إنت ممكن تنقل للمكان العدوى

هذا ال Mask ممكن يتوصل بجهاز يضخ له هواء

يسموه powered air purifying respirator ، دا مش متوفر أوي عندنا

بالتالي ،

الي بيلبس الماسك الجراحي الهدف منه إنه ميعديش غيره ، أكثر منه إنه يحمي نفسه ميعديش غيره بنسبة أد إيه ؟؟ 50 %

القماش؟؟ ميعديش غيره بنسبة 40 %

طب الماسك ال respirator؟؟ ميعديش غيره بنسبة 70 %

مين اللي يلبس الماسك؟؟

الطفل اللي أقل من سنتين ممنوع ( لأنه ممكن يتخنق بيه ، أو يشنق نفسه بيه )  
الأطفال اللي أكبر من كده بنديها أشكال ورسومات بحيث إنها تكون مبسطة وهي لابساها ولبسها أدامها عشان يتشجعوا ويلبسوا زينا

إيه هي محاذير السلامة؟؟

الماسك بيعمل مشكلتين على مستوى النفس ،

- بيعمل صعوبة في النفس ( لأنك بتتنفس من خلال قماش مرتكب على قماش على قماش )  
يبقى إنت بتشد النفس بمقاومة
- لما تيجي تخرج النفس ( بتخرج ثاني أوكسيد الكربون ) لو مخرجش كويس والماسك محكم ( والماسك عشان يكون فعال لازم يكون محكم ) ممكن تعيد استخدام وتنفس ثاني أوكسيد الكربون ، ودا لو تم مرة ورا الثانية ورا الثالثة ، ممكن يدوخك ويخليك يغمى عليك ( عشان كده مبنقاش زعلانين لما الماسك يكون مخرج شوية من الأجانب )

الماسك لما بيتلبس يحتاج إن صوتك يبقى عالي ، ال Loud speak ، دا يخليك لو إنت حامل للعدوى ( الفيروس يتنشر أكثر )  
ويخلي ال viral load لو إنت عندك عدوى بدل ما تخرج النفس على الشارع ( الماسك يخليك تخرج الفيروس وتأخذه ثاني ، تخرج وتأخذ  
الفيروس ، تخرج وتأخذ الفيروس ) بيسموه heavier viral load  
يبقى العدوى تزيد أكثر

الهواء ممكن يطلع من الماسك على عينيك ، واللي لابسين نظارة ممكن تغبش أدامه وميقاش شايف  
ممكن تعملك احتقان في العين ، ممكن الماسك يزق الأذن لأدام من كتر التثبيت ودي مشكلة كلنا بنعاني منها وعشان كده الماسك اللي برابط  
أحسن من الماسك أبو استك المزعج دا

في المستشفيات بيعملوا حاجة اسمها هيبا فيلتر ،

أوضة بتكون negative ( فيها ضغط سلبي ) وظيفته إنه يشفط الهواء من كل أرجاء الدور الموجود فيه ويرميه في مكان معين مبني في  
المستشفى من الخارج عشان يستقبل هذا الهواء اللي ممكن يكون ملوث وبالتالي يحمي الطاقم الطبي من التنفس لفترات طويلة

يبقى دي مخاطر الكمامة ،

إعادة النفس حامل لثاني أوكسيد الكربون ، صعوبة التنفس ، الصوت العالي اللي محتاجه عشان أتكلم فيعلى الصوت فيطلع virus أكثر ،  
heavier viral load لما بتنفس الفيروس بدل ما يخرج للشارع وينطلق ، يؤذي العيان ، يبوظ الأذن والجلد أحيانا ، يغبش على النظارة

مقدم الخدمة الطبية ،

يفضل ميكونش عنده سكر ، وميكونش عنده صلح (لأن ال androgen ب reflect إن الشخص ده More susceptible ، السن يكون  
أقل من خمسة وستين سنة ، لو فصيلة الدم O ( بيكون More protected ) ، ويفضل لو كان أخذ العدوى يجي يقدم الخدمة الطبية  
بعد ما يبقى PCR negative

كيف تتم العدوى؟؟

العدوى عشان تتم ، كمية الفيروس مضروب في زمن اللقاء ( الوقت )  
يعني عشان العدوى تحصل فيه حاجة عندي اسمها كمية الفيروس ، وزمن اللقاء ، ومكان اللقاء ، وبعد وقرب اللقاء  
الكلام ده مهم جداً ،  
( لأنك وإن بتتنفس في الدقيقة لو إنت مُصاب بتطلع عشرين جسيم من الفيروس )

( ولو إنت بتتكلّم بتطلع مائتين جسيم من الفيروس في الدقيقة )  
( ولو كحيت أو عطست بتطلع مائتين مليون جسيم من الفيروس )

### طبيب ،، عشان العدوى تحصل محتاج أد إيه ؟؟

محتاج ألف جسيم من الفيروس  
يبقى إذاً خد بالك هذا الكلام غاية في الخطورة ،، يبقى لو هتقف مع حد لازم تقف على بُعد متر ونص أو مترين ( دي اسمها مسافة اللقاء )  
ويكون في مكان مفتوح ( دا اسمه مكان اللقاء ) ،، وتقتصر الوقت على أد ما تقدر ( يبقى في خلال دقيقتين أو تلت دقائق ) مش أكثر

أديني مثال ،،

معادلة العدوى بتساوي كمية الفيروس مضروب في الزمن بتاع الوقوف  
كمية الفيروس ( لو إنت بتأخذ نفس بصورة طبيعية يبقى بتطلع 200 في الدقيقة )  
لو قعدت خمس دقائق

يبقى 200 في 5 بيساوي 1000 ( يبقى ممكن يجيلك العدوى )  
لو خليتهم تلت دقائق ( يبقى 600 ،، يبقى ميجلكش العدوى غالباً ) وهكذا

نتكلم بعد كده على ثلاث بنود ،،  
الحامل ومريض الكبد ومريض الكلى

### الحامل ،،

هتتعامل معاملة طبيعية تماماً زي مريض الكوفيد اللي مش حامل ،،  
لكن ،،

نأخذ بالنا إن ال favipiravir ممنوع استخدامه في الحمل وبعد الحمل  
( ولو أخذناه ووقفناه مينفعش الحمل بعد ما نوقفه بما يقارب ثلاث أسابيع أو شهر كمان )

لو حامل ،، مبنديهاش الأدوية المسيلة للدم عن طريق الفم ،، لكن تأخذ أدوية المسيلة للدم عن طريق الحقن ( low molecular weight heparin ) ( الكليكسان ) أو الهيبارين البلدي العادي

### الحامل ،، تعمل أشعة مقطعية ؟؟

أه تعمل أشعة مقطعية ،، وتعمل أشعة عادية ،، ومفيش مشاكل  
الجنين بيبقى في البطن وإحنا بنصور الصدر ،، ولو لبست abdominal shield ( واقى للبطن ) إن شاء الله مش هيبكون فيه مشاكل  
ومبضرناش إن إحنا نشخص أكثر من إننا نكون جاهلين ومش عارفين المريض عنده ايه

### مريض الكبد ،،

فيه عندي أدوية كتير بتتأثر بالكبد ،، من ضمنهم ال hydroxychloroquine على وجه الخصوص ،،  
وال kaletra ( lopinavir - ritonavir ) ،، وال remdesivir  
الثلاث أدوية دول بيتكسروا في الكبد ،،  
وكمان ال macrolides

لو سمحت خُذ بالك ،، عشان كل الناس عمالة تأخذ أزيثرومايسين وكلاريثرومايسين  
دول بيتكسروا في الكبد ،، فلو إنت هتأخذ في مريض الكبد ،، لو سمحت روح لحاجة تانية  
روح لل doxycycline group أو ال linezolid group  
بلاش تبقى محمل على الكبد بهذه الصورة

مع إن في ال hydroxychloroquine قالك إنك ممكن تأخذ الجرعة بصورة مخفضة ( مقسومة على اثنين ) بالذات لو كانت انزيمات الكبد مش عالية أكثر من ثلاث أضعاف

ال Remdesivir بردو لو انزيمات الكبد عالي أكثر من ثلاث أضعاف ،، يفضل إن إحنا نبعد عنه

#### مريض الكلى ،،

نأخذ بالنسبة إن ال direct oral anticoagulant ( الأدوية بتاعت السيولة ) التي تؤخذ عن طريق الفم ممنوع **أومال مين اللي بيتأخذ؟؟**  
ال Low molecular weight heparin ( اللي اسمه enoxaparin sodium ) وبالبلدي اسمه كليكسان

وجميع الأدوية اللي هي Nephrotoxic ( ضارة على الكلى ) اللي هي مؤذية على الكلى المجموعات اللي بتصنف C و D ،، إحنا هنبعد عنها لأنها ممكن تؤذي وتضرني والريبافيرين نفس الكلام المفروض إحنا نبعد عنه

معلومة نأخذها سريعاً على مسيلات الدم ،،  
المرض ( الكوفيد ) إتفقنا إنه مشهور بإنه يعمل جلطات بصورة متكررة يبقى أنا ممكن استخدم مسيلات الدم

مسيلات الدم فيه منها ثلاث أنواع :

- ال unfractionated heparin ( الهيبارين البلدي العادي بتاع زمان ) دا يفضل للمريض بتاع الرعاية المركزة اللي متوصل على جهاز تنفس صناعي ( لأنه بيشتغل كمضاد للسيولة وكمان مضاد للإلتهاب )
- ال Low molecular weight heparin ( اللي سميناه enoxaparin sodium ) اللي بيتأخذ واحد وحدة دولية لكل كيلو جرام كل 12 ساعة لو كان therapeutic وكل 24 ساعة لو كان prophylactic
- لو العيان في البيت لو الحالة مستقرة وتديه بجرعة وقائية يتأخذ زى rivaroxaban عشرة ،، ولو كان ال D dimer عالي معدي الألف يتأخذ 15 أو 20 مجم

#### العيانين اللي هما سنهم صغير إيه الجرعات بتاعتها؟؟

الهيدروكسي كلوروكين ببساطة في الكبار بيتأخذ 13 ملي لكل كيلو جرام كل 12 ساعة في الصغيرين 6.5 ملي لكل كيلو جرام كل 12 ساعة  
دي أول جرعة في أول يوم ،،  
وبعد كده تقسم على اثنين لمدة خمس أو عشر أيام

ال Remdesivir بيتأخذ في الكبار 200 ملي الجرعة الأولى ،، وبعد كده 100 كل 24 ساعة لمدة خمس أيام أو تسع أيام وفي الأطفال ،، لو أقل من أربعين كيلو جرام بيأخذ 5 ملي لكل كيلو أول يوم ،، وباقي الأيام 2.5 ملي لكل كيلو ( يعني بنقسم الجرعة على اثنين )

الناس اللي بتأخذ المرض وتيجي بعد كده ونقول هي خفت ولا مخفتش؟؟ اسمها توابع المرض وهنتكلم عن حاجة مهمة اسمها chronic fatigue syndrome ،، أو post COVID symptoms وجدوا إن المرضى اللي أخذوا هذا المرض بيصابوا بنوع من الأرق ( نوم متقطع وصداق ونقص في الذاكرة ونقص في التركيز ) يسموها brain Fog ( يقولك مخه مضرب ) عنده احباط ،، سقف التوقعات عنده unpredictable ،، عنده نوبات من الإرهاق ليست كنوبات التعب الطبيعي ،، دي اسمها Post COVID symptoms ودي متوقعة

### ليها علاج؟؟

أيوة ، الراحة ، وتسمع لجسمك ( Listen to your body )  
يعني تعبان ، خش نام ، وتأكل خمس وجبات في اليوم ، وأكل خفيف ، وفاكهة ، وخضار طازجة  
وتعمل تمارين خفيفة تتناسب مع الوزن لو تقدر وتتشمس  
ولو عندك نقص في فيتامين دال ممكن تأخذ فيتامين دال وفيتامينات

### بعض المرضى بجيلهم سخونية بعد ما بيخفوا ،

متقلش منها ، دا لسه inflammatory cytokines بتطلع من وقت للتاني  
بس تأخذ بالك ، ممكن تأخذ لها باراسيتامول ، وممكن تأخذ Low dose steroid ( الكورتيزون ) ، وممكن تعمل صورة الدم لو كانت  
الحرارة مستمرة وتتأكد إن مفيش ارتفاع في عدد خلايا الدم الصديدية ولا shift to the left ولا toxic granulation اللي هو ما يثبت  
وجود عدوى بكتيرية ثانوية ، اللي لو كانت موجودة يبقى إنت محتاج تأخذ مضاد حيوي ، ولو مكانتش موجودة يكتفى إنك تحط نفسك على  
الباراسيتامول وكفاية أوووي

### اكتساب المناعة؟؟

أه بنكتسب المناعة ، والتطور للفيروس مبهصلش ، وإعادة العدوى مبهصلش  
وحتى هذه اللحظة لم يثبت لدينا إعادة العدوى

### عندي عيان بعالجه في البيت وبدأ العيان دا أنا شايف إنه مش مستريح ، أو من البداية أول ما شوفته حسيت إنه مش كويس يعني إيه؟؟

تقولي : والله لما بأجي أبص عليه ، ألاقى نفسه أسرع من 30 ، أو أوكسجينه بال Pulse oximetry أقل من 93 % ، أو الأشعة بتاعته  
تدهورت أكثر من خمسين في المية في خلال 48 ساعة أو 24 ساعة  
ولما أقيسله حاجة اسمها  $PaO_2 / Fi O_2$  ألقاها أقل من 300  
يبقى العيان ده مينفعش يقعد في البيت ، أو العيان ده المفروض من البداية يروح المستشفى

طبيب ،

### أنا ظروف لا تسمح؟؟

حطه على الهيبارين ( Low molecular weight heparin ) حقن ، ووصله على أوكسجين  
ونقص الأوكسجين بتعامل معاها بإسطوانة الأوكسجين بتتوصل ب Nasal prong أو جهاز مركز الأوكسجين بيتوصل على الكهرا من غير ما  
تروح الإسعاف وتنقل اسطوانة ( اسمه oxygen concentrator ) بيتباع في مراكز الخدمات الطبية في شارع القصر العيني أو بعض  
الشركات المتخصصة ، ونخلي العيان نايم على بطنه في حال عدم توفر مكان في المستشفى  
لكن ،  
العيانين دول يفضل إنهم يكونوا بيتعالجوا في المستشفى

### خدت العدوى واتعالجت ، وتم تعافيك ، تعرف إزاي؟؟

ال CDC حطت اتنين بروتوكول بيقول :  
إنت بيتم إطلاق سراحك بال TT < يا time based ، يا test based strategy

### إيه ال time based strategy؟؟

بيقولوا : بعد اختفاء الحرارة بثلاث أيام ( اسمه time based )

أو لو عملت ال PCR وطلع negative ، وعملته تاني وطلع negative  
وما بين العملتين كان فيه حوالي 24 أو 48 ساعة

### نعتد على مين ؟؟

أقولك : إنت مقدم للخدمة الطبية ولا لا ؟؟

تقولي : والله أنا مقدم للخدمة الطبية ، يبقى لا بد إن حضرتك تعتمد على ال test based strategy

تقولي : والله أنا انسان عادي ، وإنسان بسيط ومقدمش خدمة طبية لحد ، يبقى time based strategy ( عد ثلاث أيام من تاريخ اختفاء الحرارة ، إحنا بنقول خليها أسبوع أو عشر أيام عشان نبقى مطمئنين ) ولما تيجي تتعامل ده مش معناه إطلاق الأمان ، بردو هنتعامل وإنت لابس الماسك وإنت محافظ على التباعد الإجتماعي وتكون لابس الكمامة

### لو سمحت ،

دي مجرد ارشادات واجابة عن تساؤلات ، ولكن ينبغي أن يتم كل هذا تحت اشراف طبي كامل ومتكامل

فيه ناس بتسأل ، هو إحنا عندنا فيروس ولا أكثر من فيروس ؟؟ يعني سلالة ولا أكثر من سلالة ؟؟

عايز حضرتك تعرف معلوماتين هنا بقى ،

الفيروس فيه حاجة اسمها antigenic shift ، وحاجة اسمها antigenic drift

إيه الفرق ما بين ال shift وال drift ؟؟

ال shift ، هو عبارة عن إن الفيروس بيتحد بفيروس أخوه ويدوني شكل ثاني جديد ( أو فيروس يتحد بفيروس ثاني مش أخوه ويديني شكل ثاني خالص غير الشكل اللي كان موجود بس عليه نفس الأجسام المضادة )

### تقولي : دا حلو ولا وحش ؟؟

أقولك : دا حلو ، وآخر حلاوة ، لأن طالما نفس الأجسام المضادة يبقى ربنا مش هيصيح تعبنا في إيجاد اللقاح اللي هيجمينا من هذا الفيروس على عكس ال antigenic drift

### إيه ال antigenic drift دا ؟؟

دا يحصل تحور جيني لا قدر الله ( يا رب ميحصلش ) في الفيروس

وبالتالي ، يضع مجهودنا هباءاً منثوراً في اكتشاف لقاح لهذا الفيروس ونحتاج ثاني نتكلم على سنة وسنة ونص وسنتين لحد ما نعمل تجارب ويطلع لي ثاني لقاح جديد أقدر أحارب بيه

يبقى أنا فيه عندي حاجتين بيحكموني ،

هل دا antigenic shift .. ولا antigenic drift ؟؟

ال shift جميل وحلو ، ولو حصل ، مقدور عليه ، وال vaccine هيجيب نتيجة

لو antigenic drift ، يبقى إحنا روحنا في خبر كان

### الأسئلة

#### بندي الأطفال anticoagulant ؟؟

أيوه ، إحنا بندي ال anticoagulant طالما فيه Indications :

- إن العيان Hypoxic
- أو العيان desaturate على room air
- أو ال X-ray أو ال CT فيه marked dense radiologic abnormalities
- أو العيان يكون Markedly tachypnic
- أو نكون قيسنا ال D dimer ولقيناه عالي ( عالي أكثر من ألف هدي therapeutic ، أقل من ألف هدي prophylactic )



**لو العيان معدنوش سخونية من الأول خالص ، إمتى أقول إنه خف ؟؟**

طيب ، عرف إزاي إنه عيان ؟؟ تقولي : والله كان مخالط

لو كان مخالط ، يبقى يعد على نفسه 10 أيام من تاريخ المخالطة ،

لا يزال مخالط ، يبقى لا يزال إنه يكون معدي ، تقولي : إشمعنا ؟؟

أقولك : لأن فيه حاجة اسمها فترة الحضانة تتراوح ما بين أربع أيام ل 21 يوم ، فمممكن يكون الفيروس موجود وبيتكاثر ولسه لم يعطي صورة

مرضية فلازم يكون عنده الحذر

الحذر يعني إيه ؟؟ يعني دايماً stand by لابس الكمامة وعامل المسافة اللي ما بينه وبين اللي أدامه

**أقصى مدة أدي فيها الأزيثرومايسين أد إيه ؟؟**

بيتأخذ 6 أيام أو 5 أيام

بس مهم جداً إننا نبقي عارفين إنه بيتأخذ على معدة فاضية ، مينفعش يتأخذ على معدة مليانة

لأن ال systemic absorption بيبقى 50 % affected

يبقى كأنك فقدت نص قيمة الدواء

ولو العيان still feverish وعندي مشاكل Infection ،

مممكن أضيفت على حاجة ثانية غيره ، وممكن أضيفله 3<sup>rd</sup> generation cephalosporin زي السيفوترياكسون اللي الناس عمالة تكتبه

ليل ونهار

**بقالي خمسة وعشرين يوم وبعمل المسحة كل خمس أيام كل مرة تطلع إيجابي ؟؟ أعمل إيه ؟؟ وإيه السبب وأنا مريض سكر وكمان في**

**المستشفى ؟؟**

ولا ليها المسحة أي قيمة ، المهم حضرتك أخبارك إيه

الأعراض اللي كنت جاي بيها ، النهجان والكحة وجع الزور والسخونية

لو اختفوا عدوا وراهم سبع أيام طالما إنت غير مقدم للخدمة الطبية ، وتخرج بعد كده تاكل وتشرب في بيتك وتنام

وحكاية إن ال test يطلع Positive ليس له قيمة

وقولنا إن ال test بيطلع Positive خطأ لأنه ب detect part of the RNA of the virus ( بيكتشف بعض البقايا الحمض النووي

RNA المسؤول عن الفيروس وليس الفيروس بذاته )

**استخدم ال N95 في العيادة ؟؟ هل ممكن استعماله أكثر من مرة ؟؟**

هو ال N95 المفروض معمول عشان يُستخدم مرة واحدة

لو أنا عايز أستخدامه أكثر من مرة ، تمام استخدمه ، بس خلي عندك اتنين ماسك

استخدم ماسك وسيبه ، وتاني يوم استخدم واحد وسيبه ، يبقى هيمر عليه أكثر من 48 ساعة

هيعقم نفسه بنفسه ، لا حبذا لو كنت رشيت ال outer surface بتاعه بكحول

و Never إن إيدك تلمس ال inner surface بتاعه

بعض الناس بيفتكس افتكاسة يقولك أنا هلبس ال N95 وأحط فوقه ال surgical mask ، موافق

وبعد كدا يرمي ال surgical mask ويرجع تاني يكمل على ال N 95 ، بردو شغال

بس كل الكلام ده مش صح

الصح التهام ، إنه يستخدم مرة واحدة

بس عشان القيمة المادية وكلنا وهنا وبرأ يبقى ممكن نستخدمه تجاوزا بهذه الكيفية أكثر من مرة

**لو الأشعة وحشة وال D dimer مش عالي والأعراض سيئة والمريض في الرعاية يأخد anticoagulant كوقاية ولا علاج ؟؟**

علاجي ، علاجي



يا جماعة خدوا بالكم ، ما يحدث بداخل الأوعية الدموية لا نراه ، لا نراه  
 زي ما بقولك إيه رأيك في القلم ده ، تقولي جميل  
 أقولك : إيه رأيك في الأنبوبة بتاعته مليانة ولا فاضية ؟؟ وإنت مش شايفها ؟؟ أنا إيش عرفني  
 كذلك الحال ، الأشعة حلوة وجميلة فيها GGO ( ground glass opacity )  
 طب والأوعية الدموية ؟؟ معرفش  
 الأوعية الدموية منتشر على سطحها ال ACE 2 ( angiotensin converting enzyme receptor 2 ) اللي هو الفيروس بيخش  
 وبيخترقها وبيعملك thrombosis ( تجلطات ) يبقى علطول لازم أدي جرعة علاجه  
 طالما العيان مش كويس ومبيتحسنش  
 العفريت الغير مرئي هو ال embolization

**فيه حالات فيها neutropenia ومعها lymphocytosis وكل الأعراض موجودة كدا نعتبرها COVID ؟؟**

ال CBC يا جماعة مبتشخصش ، اللي بيشخص المسحة مع الأعراض  
 أو الأشعة المقطعية مع الأعراض ، أو المسحة والأشعة المقطعية والأعراض

**أومال ال CBC بعتمد فيها على إيه ؟؟**

بتعتمد فيها على بناء الطن والشك يزيد ولا ميزدش  
 وكمان بعتمد فيها على المرض درجة الخطورة بتاعته أخبارها إيه ؟؟  
 تقولي : إشمعنا ؟؟  
 أقولك : أصل فيه عيانيين بيبقى عندهم Lymphopenia ( نقص في خلايا الدم الليمفاوية ) وفيه عيانيين بتطلع Normal ، وفيه عيانيين  
 بتطلع عالية  
 يبقى إذا ال CBC معتمدش عليها في التشخيص

**فيه فرق بين الهيدروكسي كلوروكين والكلوروكين ؟؟**

أه ، الهيدروكسي كلوروكين أفضل والمشاكل بتاعته أقل وال effect بتاعته أعلى

**هل عدم وجود سخونة في حالات الكورونا معناه إن المناعة ضعيفة وإنه سيطر عليها ؟؟**

لا ، ليس بالضرورة ، دي معركة بين الجسم وما بين الفيروس  
 ممكن يبقى معاها fever ، وممكن ميكوش على حسب ال Inflammatory cytokines وعلى حسب الجسم رد إزاي  
 رد بحكمة وأناة ، ولا رد بعنف وعُشم

**حقن ال Actemra هل ليها دور ؟؟ وكيف تُستخدم ؟؟**

حقن ال Actemra ليها دور واختراع سحري هایل في منتهى الجمال ، العيانيين ال severe والعيانيين ال critical بالذات اللي هما راحوا  
 لل cytokine storm الأكتيمرا act as anti interleukin 6  
 يعني بتضاد عمل دلالات الإلتهاب ، بتتأخذ وبتجيب نتائج هائلة  
 مبتتأخذش أكثر من جرعتين لو سمحتم ما بينهم على الأقل 12 ساعة  
 ولا يعاد تكرارها  
 ونأخذ بالنأ إنها بتأثر على الكبد ، ولو كانت إنزيمات الكبد مرتفعة من ثلاث أضعاف لا تؤخذ  
 الأكتيمرا فيه منها تركيزين 200 و 400  
 والجرعة بتاعته من 4 إلى 8 مجم لكل كيلو جرام  
 يفضل أول جرعة تبقى 8 وتاني جرعة تبقى 4 مجم لكل كيلو جرام

ويفضل لو إنت قيست قبله ال interleukin 6 ولقيته عالي ( لكن متربطش نفسك بيه ، افرض إنت مش عارف تقيسه والعيان بتاعك ب deteriorate ، إدي )

**هل أنا كصيدلي أقدر أخذ هيدروكسي كلوروكين كوقاية والكليكسان أيضاً؟؟**

لا ،

الهيدروكسي كلوروكين كوقاية لا ، والكليكسان كوقاية لا

إنت كصيدلي تقدر تأخذ اللاكتوفرين

اللاكتوفرين يا جماعة ب combine ACE2 receptors ( بغطيتها )

وبالتالي يمنع إن الفيروس يخترق الخلية ، يمنع إنه يخش من البداية ، وطالما إنه قدر يمنع إنه يخش من البداية

إذاً هينجح إنه يمنع إن الفيروس ده إنه يتكاثر

ومعانا الفيتامين سي ومعانا الزنك

الهيدروكسي كلوروكين ، اتكلموا عليه في وقت من الأوقات وقالوا إنه ممكن يعمل هذا ال effect

لكن ،

في الحقيقة حتى الآن لا يوجد من ينصح بيه

**متى يعود مقدم الخدمة الطبية؟؟**

بعد ما يعمل مسحتين ويطعلوا سلبين ودا مفيهوش تهاون

**بالنسبة للحالات ال Mild في البيت يأخدوا anticoagulant ولا لا؟؟ ومدة أد إيه؟؟ وإيه أفضل steroid ولمدة كام يوم؟؟**

الحالات ال Mild لو هو كويس ومبيحصلوش desaturation وال D dimer بتاعه حلو وال CT مفيهاش infiltrate مياخدش طيب ،

لو هو Mild بس بيبقى dyspnic و desaturate وال CT فيه infiltrate يأخذ

يأخذ أد إيه؟؟

مدة تتراوح ما بين ثلاث أسابيع لشهر ونص ( Up to 3 months ، لو كان عنده DVT أو جلطة قبل كدا )

ولو مكنش عنده قبل كدا يبقى كفاية ثلاث أسابيع

ولو كان desaturate ممكن تكمل لخمسة وأربعين يوم

خدوا بالكم يا جماعة ،

حتى الآن الكورونا لا يزال مستجد ، لا تزال خبراتنا كلنا فيه مستجدة

لكن ،

إحنا بنتكلم حتى الآن بقالنا ست شهور عايشين في هذا الوباء ، فإحنا بنستمد الخبرة من خلال الست شهور

أفضل steroid ، هتعتمد على إنت كنت ماشي injection في المستشفى ولا ابتديت Oral في البيت

( ال Methyl prednisolone كويس ومفیش منه مشكلة ، ممكن ابتدي من ربع لنص لكل كيلو جرام يتقسم على جرعتين حوالي ثلاث

أسابيع وبعد كده كل عشر أيام أو خمس أيام according to severity أسحب وأخفض الجرعة بالتدريج )

**هل يمكن استخدام ال Actemra مع ال Remdesivir في نفس الوقت؟؟**

أه ممكن طبعاً ، وال Remdesivir الحمد لله بدأ يتوفر بس مش بكميات كبيرة ، لكن موجود ومتوفر

بيشتغل كا anti viral ( بيمنع ال viral multiplication ) وبنستخدمه في العيانيين ال severe والعيانيين ال critical

وزي ما اتفقنا ال dose بتاعته 200 بيتأخذ وريدي أول يوم وبعد كده 100 كل أربعة وعشرين ساعة لمدة تسع أيام

ولو أطفال أقل من 40 كيلو جرام يأخذ 5 ملي لكل كيلو جرام أول يوم ،، وبعد كده 2.5 ملي لكل كيلو جرام لمدة تسع أيام أو خمس أيام على حسب الإستجابة

**ما هي المعيارية الأقرب لتشخيص حالة COVID 19 الخفيفة والمتوسطة في حال عدم وجود فحص الأجسام المضادة للفيروس أو فحص ال PCR ؟؟**

الأشعة المقطعية مع الأعراض ،، مع صورة الدم لو فيها Lymphopenia دا كافي أو ووي والأعراض زي ما اتفقنا تم تغييرها تماماً ،، مبقتش كحة جافة ،، ممكن يبقى معاها بلغم مبقاش بس وجع في الزور ونهجان وسخونية ،، دا ممكن يبقى فيه مغص وترجيع وفيه إسهال وفيه فقد في حاسة الشم والتذوق ،، وفيه أحياناً النوم الكثير والدوخة والتكسير والهمدان والدغدة كل دي بقت أعراض خاصة بالكوفيد ،، ولما نسمعها في زمن الكوفيد ،، ينبغي علينا تشخيص الكوفيد إلى أن يثبت عكس ذلك

**ال kaletra ( lopinavir - ritonavir ) جرعتة ولمدة كام يوم بحد أقصى ؟؟**  
ال kaletra عبارة عن دوايين ( lopinavir - ritonavir ) يا جماعة حد أقصى عشر أيام ،، والجرعة بتاعته اللي هو عبارة عن دوايين ٢٠٠ على ٥٠ ،، بأخذ قرصين كل 12 ساعة ،، لمدة خمس أيام إلى عشر أيام وأخذ بالي وعيني على ال Liver

**هل فيه أي تعليق على البروتوكول والصادر منذ شهر ؟؟ وهل فيه إضافات متوقعة خلال المتغيرات في الفترة الأخيرة ؟؟**  
إن شاء الله البروتوكول من ساعة ما اتحط واللجنة العلمية المشرفة عليه عاملة فيه شغل في منتهى الجمال ويكاد يوازي إن لم يكن أحسن من البروتوكولات العالمية ودي مش شهادة عشان أنا موجود فيها لا ،، أنا بتكلم على الفترة اللي فاتت وإحنا أول ناس حطوا ال anti coagulant وإحنا أول ناس حطينا ال corticosteroids وإن شاء الله فيه تعديلات بتتم على مستوى البروتوكول ،، وفيه مناقشات بتتم في اللجنة العلمية كل أسبوع عشان أي متغيرات بتطرأ على الساحة إذا كان إضافة زي ال Remdesivir أو أي دواء جديد هيتم مناقشته وبيتم تعديله وبنوالي تبليغ حضراتكم بيه

**فيه قناع بيتغير له فلتر ،، هل بيحمي من الفيروس ولا بتاع غازات بس ؟؟**  
على حسب هو مكتوب عليه إيه ،، يعني لو مكتوب عليه بتاع غازات ،، يبقى بتاع غازات بس عشان كده يا جماعة نصيحة مني ،، مهم جداً تبص اللي مكتوب على القناع أنت شاربه منين ،، وهو كاتب لك عليه إيه ،، وهو بتاع غازات ولا بتاع oils ولا بتاع toxic gases ولا بتاع بكتيريا ولا بتاع فيروسات

**اللي عنده فقدان حاسة الشم ،، يخرج إمتى من العزل المنزلي ؟؟**  
يخرج بعد سبع أيام من تاريخ تناول العلاج ،، لأن حاسة الشم والتذوق بتأخذ من ثلاث أسابيع لشهر ونص وبنقول بنحسنها إن إحنا ندي Long acting selective non sedating anti histaminic حاجة زي ال fexofenadine أو ال Loratadine أو ال Psuedo loratadine

**لو مش لاقى N95 ألبس اثنين ماسك جراحي ؟؟**  
افتكاسة مصرية ،، لكن لا يوجد ما يمنع وممكن تزود الكفائة بتاعته بدل ما هي ٧٥ نزودها لثمانين ☺  
ال face shield ،، بردو لا يوجد ما يمنع  
لكن ،،

خدوا بالكم يا جماعة ،، الماسك الجراحي يحمي الآخرين من شرور مرتديه أنا لما بلبس ماسك جراحي إنت بتتهالك إنك بتحمي نفسك ،، الإجابة لا ،، إنت بتحمي غيرك منك

تقولي : يعني إيه ؟؟  
أقولك : ببساطة معاك رقمين ركز لي فيهم لو سمحت ،، ماسك جراحي بيحميك بنسبة 75 في المية ويحمي غيرك إنه يتنقل له العدوى بنسبة خمسين في المية بس

### تكسير العظام ومفیش سخونية إيه علاجها ؟؟

تكسير العظام علاجها إنك تديله مسكن قوي ،، كانوا زمان بيعترضوا على الایبوبروفین ،، دلوقتي بيقولك : الایبوبروفین حلو مفیش مشكلة خالص تدي باراسيتامول أو ایبوبروفین المهم وإن بتدي العلاج تحمي المعدة من ال gastritis بانك تحط العیان على حاجة زي البانتوبرازول

### الكولشيسين والایفرمیکتین ؟؟

بعض الناس جربوه ،، أنا مجربتهمش لكن ،،

المشكلة في الكورونا يا جماعة إن فيه ناس كتير جداً مخدتش علاج وخفت فاللي مخدش علاج وخف بيقولك : أنا خفيت من غير علاج وفيه ناس خدت لبن العصفورة وخفت ،، فاللي خد لبن العصفور وخف قالك : لبن العصفور بيخفف وفيه ناس خدت الهيدروكسي كلوروكين وخفت فقالت : الهيدروكسي كلوروكين بيخفف فإحنا مش هنعترض على أي حد ومش هنؤيد أي حد لكن ،،

لا بد إن يكون فيه أساس علمي لاستخدام أي دواء ،، الایفرمیکتین والكولشيسين ليهم أساس علمي ولا يمنع من استخدامهم

### البيتادين المخفف بيموت الفيروس ؟؟

أنا في الحقيقة مقرتش هذا الكلام ،، سمعت عنه زي حضرتك بالظبط ،، معرفش مدى صحته

مريض أخذ علاج COVID كامل وعمل الأشعة بعد شهر ظهرت باتش جديدة أكثر مما كانت ،، لكن الأعراض اختفت تماماً ؟؟ ولا يهملك يا دكتور ،،

دا هو المتوقع ودا اللي بنشوفه ،، دا ال every day practice

على مدار على شهر كامل دلوقتي من بعد رمضان حتى هذه اللحظة بنشوف العیان عنده بطشة ولا بطشتين وبعد أسبوعين نقوله يلا روح اعمل الأشعة وريهالنا بقى ونكون قاعدين مستنيين الجائزة والمكافأة يجيلك العیان وشه أصفر وإنك كمان وشك يصفر جنبه إسمعنا ؟؟

يقولك : الأشعة يا دكتور كاتبين فيها تقرير مهيب ،، دا بيقولوا إنها أسوأ من اللي فاتت صح ،، التحسن الإكلينيكي يسبق التحسن في الأشعة بما مقداره عشر أيام أو اسبوعين عشان كده ينصح إن المريض ميعدش كل شوية الأشعة المقطعية العیان عمره ما كان فيلم بيتصور ولا أرقام بتتقري ،، العیان عیان النفس استريح ،، الحرارة راحت ،، الشهية اتفتحت ،، الوزن بدأ يبقى تمام ،، العیان بدأ يتكلم كويس ،، يأكل كويس ،، يشرب كويس ،، ينام كويس ،، العیان بتاعي بيتصلح ،، طز في الأشعة ،، متفرقش معايا كتير هتأخذ وقتها وترجع للطبيعي بإذن الله بس نأخذ بالناس من حاجتين في المرض دا : فيه تليفات ممكن تحصل ،، فيه جلطات ممكن تحصل يبقى لو سمحت تبقى مغطي نفسك بالكورتيزون ،، ومسيلات الدم

عیانین کتیر جداً بيبقى عندهم tachycardia بتوصل ل 140 إيه في البروتوكول ممكن يكون سبب ذلك ؟؟

لا يا باشا ، دا مش البروتوكول ،  
 دا الفيروس وعاملك Myocarditis ، تأخذ بالك من القصة دي  
 يبقى إنت محتاج تزود ال anti inflammatory ، محتاج تحط corticosteroids كويسة  
 إحنا الأدوية بتاعتنا كلها للأسف بتعمل bradycardia ، الهيدروكسي كلوروكين بيعمل bradycardia ، الكاليترا بيعمل bradycardia ،  
 الأزيثروميسين بيعمل bradycardia ، مفيش حاجة من البروتوكول غالباً بتسرع ضربات القلب ،  
 ضربات القلب بتبقى سريعة  
 يبقى العيان hypoxemic ، أو عنده Pulmonary embolism ، أو عنده coronary insult ، أو عنده حاجة على مستوى  
 ال Heart ، أو السخونية ، يبقى لازم تراجع نفسك

**فيه شكوى غريبة ، كثير من المرضى اللي تحت العلاج بيشتكوا بإرهاق رهيب ؟؟**  
 يا راجل إحنا لسه قايلين أهو ، يا جماعة chronic fatigue syndrome  
 قلة النوم والأرق والتكسير والهمدان والدغدغة بصورة غير طبيعية وغير محتملة ، ركز معاه إنك تديه مسكنات بصورة عالية الدنيا هتمشي  
 كويس بإذن الله

**المخالطين في نفس البيت يأخذوا فيتامينات سي و زنك وفيتامين دال وجرعته ولمدة أد إيه ولاكتوفرين ؟؟ وفي حال ارتفاع الحرارة ادي باراسيتامول بس ولا أزود معاه الأزيثروميسين ؟؟**  
 المخالط يا جماعة في البيت ، لازم يكون على أد ما نقدر سنه أقل من ستين سنة ، ومعدوش أمراض مزمنة ، ويفضل ميكونش أقرع مع  
 احترامنا لكل الصلح ( لأن نسبة ال androgen بتأثر معنا ) وفي نفس الوقت لا بد أن تكون المناعة بتاعته كويسة وبياكل ويشرب وبينام  
 كويس ، ويأخذ فيتامين سي و زنك مفيش أي مانع ، وإن كان الأفضل يأكل برتقال وليمون وجوافة  
 يأخذ لاكتوفرين ، الجرعة بتاعته كيس مرتين يومياً وبعد كده ممكن يأخذ كيس كل تلت أيام  
 وطول ما هو مُعرض لعوامل الخطر ولسه عنده حالة Positive في البيت يفضل ياخده ويكره طول ما هو مُعرض لغاية ما العيان المعزول  
 معاه في البيت يقلب Negative أو يفك العزل بتاعه

**في حال ارتفاع الحرارة أزود الباراسيتامول ؟؟**  
 أه زود الباراسيتامول

**في حالة الحرارة أزود مع الباراسيتامول الأزيثروميسين لو مخالط ؟؟**  
 زوده وأعمل صورة دم ، عشان نضمن إنت خدت عدوى ولا الدنيا عبارة عن إيه

**المخالط ببيان عليه أعراض بعد أد إيه لو اتصاب ؟؟**  
 من 4 أيام إلى 21 يوم  
 المتوسط 10 أيام

**انتهاء الأعراض كلها من حرارة وغيره بعد 7 أيام ، مع سبب استمرارية الكحة ؟؟**  
 سبب استمرارية الكحة إن دا viral bronchiolitis ، بيعمل حاجة اسمها bronchial hyper reactivity ( أو اسمها تهيج الشعب  
 الهوائية للمؤثرات الخارجية بصورة أعلى من الصورة الطبيعية )  
 الكحة دي مبتتعالجش بأدوية الكحة ، عشان الناس اللي عمالة تكتب ليل ونهار في نوتسيل و برونشيكيم والأدوية دي  
 الكحة دي بتتعالج بأدوية الحساسية أو ال Leukotrienes receptors antagonist ( اللي هي montelukast sodium اللي هي  
 singulair أو اللي اسمها asmakast ، أو اللي هي أدوية long acting selective non sedating anti histaminic  
 زي ال fexofenadine ( اللي هي اسمها تلفاست التركيزات ال 80 وال 120 وال 180 ) أو ال Loratadine أو ال Psuedo  
 loratadine ( اللي هي ال delarex وال aerius اللي هي 5 مجم ) وهكذا أو الكلارتين

دا بيحسن الكحة جداً جداً  
قرص قبل النوم ويبقى آخر حلاوة ، ، ويأخذه لمدة عشر أيام

**مصابة من ست أيام ، أعراض Moderate ، وكل الأعراض خفت ما عدا الصداع وآلام العظم ؟؟**  
إحنا اتفقنا ، ، إن الأعراض دي هتفضل مكلمة معانا وعلاجها زي ما اتفقنا الراحة ونستجيب لآلام الجسم  
نستريح ومنبذلش مجهود ، ، ونأكل تلت أربع خمس ست مرات في اليوم  
ونأخذ مسكنات على أد ما نقدر

**بالنسبة للبلازما استخدامهما ؟؟ early ولا Late ؟؟**  
بص ، ، أنا هقولك على حاجة ، ، البلازما زي ما اتفقنا إحنا ممكن نستخدمها بطريقتين  
ممكن أعمل فصل بلازما ودا بجيب نتائج كويسة اسمها plasma pheresis ودا بيبقى في المراحل المتأخرة  
وممكن نأخذ ال convalescent plasma من الناس المتعافين اللي مر عليهم أكثر من 14 يوم من تاريخ التحسن  
يعني ، ،

لو ضفنا 14 يوم تحسن على ال 14 يوم بتوع الإصابة  
اللي هيبنتدي يتكون فيهم الأجسام المضادة ، ، يبقى بعد شهر من العلاج  
هذا الشخص ممكن أخذ الأجسام المضادة بتاعته وأديها لإنسان مريض

**إديها إمتي ؟؟**  
بعض الناس تقولك : early  
ما early لا مؤاخذا بعض العيانيين بيخفوا لوحديهم ، ، يبقى أنا إزاي estimate the efficacy بتاع ال convalescent plasma !!!  
أنا بحتاجه في العيانيين ال Moderate اللي رايح ل severe  
أو ال severe اللي بيقلب critical في الحقيقة يعني  
لكن ، ،

هو بيقولك : عشان تجيب نتيجة كويسة it should be used early  
ما هو early بيخف لوحده غالباً ☺ ولا إنت قصدك early و severe من البداية !!! ممكن ، ، ممكن  
وزي ما اتفقنا بنأخذ 250 ملي بنأخذها كل اتناشر ساعة  
ونأخذ بالنأ إن يكون معمولها screening كويس  
ولازم يكون ال antibody titer فيها كويس عشان تجيب معانا نتائج كويسة بإذن الله

**الهيدروكسي كلوروكين بيتأخذ كوقاية ؟؟**  
ممكن يكون رأيي مش صائب وممكن يكون صائب ، ، بس ممكن تديه كوقاية ، ، بيتأخذ 400 أول جرعة  
وبعد كده بيتأخذ كل أسبوع ، ، وعلى حسب  
إنت لو مقدم خدمة طبية بتكمل سبع أسابيع  
ولو إنت غير مقدم للخدمة الطبية بيتأخذ ثلاث أسابيع  
دا على مستوى البروتوكول الهندي

**علاج ال COVID للحامل ؟؟**  
اتفقنا هو هو نفس العلاج لغير الحامل ، ، بس نأخذ بالنأ من ال Oral anti coagulant ممنوعة ونأخذ بدالها low molecular weight heparin ، ، أو الهيبارين العادي ، ، والأفيجان نبعد عنه تماماً عشان ال toxicity على ال fetus

**المريض اللي بيشتهي من أرق وعدم نوم تماماً ، ، هل ممكن نديله منوم زي نايت كالم ؟؟ ولا بلاش ؟؟**

ممکن نديله منوم زي نايت كالم ،، بس أنا في الحقيقة مبحش أدي منومات والي يديها يفضل يكون دكتور الأعصاب مش أنا

### ليه يا دكتور مبنديش ARBS مع بروتوكول العلاج؟؟

لا إدي حضرتك ،، الجمعية بتاعت القلب الأوروبية والأمريكية أول ما طلع الكورونا قالوا يا جماعة فيه تخط اللي ماشي على علاج للقلب يمشي عليه هو نفس العلاج سواء كان ACEI سواء كان ARBS مفيش مشكلة ،، أهم حاجة يكون الضغط مضبوط

### Post COVID fibrosis؟؟

اتفقنا إنه بيحصل لو إنت محطتش ال steroids ،، لو إنت حطيت ال steroids الدنيا هيحصلها resolutions كويس بإذن الله

### المخالط الي بيأخذ حاجات احتياطي؟؟

فيتامين سي والزنك واللاكتوفيرين ممكن يتأخذ

### استخدام ال corticosteroids لكل المرضى ولا ليه Indications معينة؟؟

لا ،،

طبعاً ليه Indications معينة ،، ال corticosteroids يا جماعة عشان أستخدمها

- لازم العيان بتاعي يكون عنده radiological abnormalities ( عنده تغير على مستوى الأشعة )
  - أو يكون عنده نهجان
  - أو يكون عنده مشاكل تنفسية
- طب ،، لو مفيش الحاجات دي أو حالة mild؟؟ مياخذش طبعاً

### حالات كتير من ال COVID ظهر في رسم القلب 1<sup>st</sup> degree heart block أو sinus brady حتى من قبل ما نبدأ علاج بالهيدروكسي كلوروكين أو الأزيثرومايسين؟؟

ممکن يكون ده toxic viral myocarditis ،، نرجع لدكتور القلب نشوف رأييه إيه ونعمل ECHO ونشوف ال cardiac enzymes ( الي هو cardiac troponin T ) نشوف أخبارهم إيه

### ال Remdesivir وال favipiravir وال Tamiflu كل ده في ال severe؟؟

أه كل ده في ال severe ،، بس ال Tamiflu لا

ال Tamiflu يا جماعة اتفقنا إنه اتشال من البروتوكول المصري ،، ومتشال من زمان من البروتوكول الأمريكي والبروتوكول الصيني لأنهم أول ما حطوه كانوا مفكرين إنها انفلونزا ،، مجرد ما عرفوا إنها كورونا اتشال

### عندي رفرقة في قلبي ،، هل دا تابع من توابع الكورونا؟؟

دا تابع من بعد توابع الكورونا ،، بس لازم نبقي مطمئنين برسم القلب وموجات فوق صوتية على القلب

### فقد حاسة الشم without fever or cough؟؟

مفيهاش أي مشكلة خالص ،، وزى ما اتفقنا بنعالجها بأدوية الحساسية

### ممکن ندي كبار السن لاكتوفيرين؟؟

أه ممکن نديه ،،

بس خدوا بالكم يا جماعة الجرعة الدوائية غير الوقائية



الوقائية بتكون كيس ١٠٠ مجم مرتين يومياً  
والعلاجية Up to < 400 و 500 في اليوم على ست ساعات أو كل ثمن ساعات ممكن نديه

**لو حالة mild وال D dimer عالي وال CRP عالي؟؟ وبقيالي 18 يوم من بداية الأعراض أعمل إيه؟؟**

ال D dimer عالي يبقى معاك ال anti coagulant موجودة

وال CRP عالي يبقى معاك ال corticosteroids موجودة

بس خُد بالك ،،

ال D dimer << reflection لل coagulation

وال CRP << reflection لل inflammatory cytokines

ال CRP أول واحد بينزل ،، وال serum ferritin بيعلق شوية ( لكن وجودهم عالي دا معناه إن إحنا (still ingoing inflammation

فلازم نحط corticosteroids ونطول بيها ،، ولازم نحط anti coagulant ونطول بيها

**بقالهم عشرين يوم في المستشفى بيدوني كليكسان ومضاد حيوي حقن صح ولا إيه؟؟**

كل حالة ليها حاجتها الخاصة

الكليكسان ممكن يتأخذ شهر ونص ممكن ،، وممكن بعد كده نقلب على حسب الحالة استقرت ولا لا

ومضاد حيوي على حسب لو كان فيه عندي عدوى بكتيرية ثانوية ولا لا ( لو فيه هناخد ،، لو مفيش ممكن consider إن إحنا نوقف بس

بشرط تكون البيئة الي إحنا قاعدين فيها برديو كويسة )

لأن بيئة المستشفى غالباً بتبقى فيها عدوى وفيها ميكروبات فبنحاول نبعد عنها على قدر المستطاع

يعني نحاول نخرج من المستشفى بسرعة على اد ما نقدر إذا كانت الحالة تسمح

**مريض سكر سكره عالي وال CT بتاعه وحش؟؟ استغنى عن ال steroid ولا مضطر أدية؟؟**

إدي steroid ،، وأقلب المريض على أنسولين

**هل يوجد دواء ممكن أخذه يقلل من فرص الإصابة؟؟ خصوصاً لمريض التليف على الرئة؟؟**

ممكن زي ما اتفقنا فيتامين سي والزنك ،، وممكن نلقل الأدوية الي بتخفف جهاز المناعة ،، وممكن نأخذ اللاكتوفرين

**كل أدوية الكورتيزون بترفع السكر؟؟**

على حسب الجرعة هي الي بتفرق مش نوع الكورتيزون الي إحنا بنديه وعلى حسب وجوده في الجسم وعلى حسب امتصاصه والتخلص منه

**هل السيلينيوم علاج وقائي؟؟**

مقرتش عنه

**الأسيكلوفير والامانتدين؟؟**

الحقيقة ملقتش ليه أي دور ،، لا ينصح باستخدامهم ،، بالذات الأمانتدين ،، دكاترة النيورولوجي خوفونا تماماً منه

**فيه أبحاث طلعت عن المناعة بعد التعافي؟؟**

الفكرة عشان البحث يبقى Valid أو يبقى ليه قيمة ،، لازم يبقى مر عليه قيمة من الزمن

حتى الآن كل الناس بتقول فيه تعافي كويس أه ،، فيه إعادة عدوى؟؟ لا

لكن كأبحاث لسه بالأمان بنسبة مية في المية

**هل تكسير الجسم فقط يتشخص COVID 19؟؟ والنوم الكثير مع صورة الدم الكويسة ؟**

لكل حادث حديث ،، هل هو تكسير جسم بس ونوم زيادة بس

ولا فيه حاجات ثانية ،، وهل فيه أعراض موجودة ومش واحد بالك منها ولا لا ؟؟

**حالات اللي عندها أعراض الإنفلونزا ومش متاح عمل مسحة لكل الناس نشخص الناس دي إزاي ؟؟**  
لو الأعراض بسيطة هناخد علاج بسيط زي الأزيثرومايسين والفيتامين سي والزنك ونشوف الدنيا أخبارها إيه ؟؟  
بدأ يظهر حرارة ،، بدأ يظهر نهجان ،، بدأ يظهر كحة  
هطلب أشعة مقطعية طالما المسحة غير متاحة

**Asymptomatic positive COVID 19 needs treatment or not**

No symptoms = No treatment = No investigations

قاعدة NO NO NO

مفیش أعراض ؟؟ أه

مفیش فحوصات ؟؟ أه

مفیش علاج ؟؟ أه

خلاص كده

واحد يقولك : أنا مخالط لحالة وبقدم لها خدمة طبية وأنا معنديش حاجة ،، أعمل إيه عشان أطمئن ؟؟  
متعملش حاجة ،، طالما مفیش أعراض  
لو فيه أعراض أعمل وصعد ،، ( خلي الصندوق مقفول )

**في بداية الموسم أصيبت ب Pneumonia والمسحة والأجسام المضادة وصورة الدم كانت كويسة ؟؟ والمقطعية كانت فيها patch مش GGO هل ده ينفي إنها كورونا ؟؟ مع العلم إن الأعراض استمرت تلت اسابيع وكانت عنيفة ؟**  
لا طبعا ،،

إحنا اتفقنا يا جماعة ،، إنها ممكن تيجي في صورة الزجاج المزكرش اللي قولنا عليه ground glass  
ممكن ييجي في صورة solid consolidation اللي هي بطشة تماما لونها أبيض  
ممكن ييجي في البلاط المزايكو اللي احنا سميناه crazy paving  
كلهم مينفوش ،، وممكن ميبقاش فيه حاجة خالص في الأشعة وبردو يكون فيه كورونا

**الإيفرميكتن كوقاية ؟؟**

مفیش كلام عليه كوقاية ،، هما اتكلموا عليه كعلاج

**الكاليترا والهيدروكسي كلوروكين لازم يكونوا في المستشفى ؟؟**

مش لازم يكونوا في المستشفى ،، بس غالبا أنا لما بروح للكاليترا بتكون الحالة severe  
يبقى هنا لازم أكون في المستشفى ،، ويفضل إنك تتابع بال ECG  
وخدوا بالك يا جماعة إن المتابعة بتاعت ال ECG معناها إني بشوف ال QT interval  
ال QT interval المفروض تكون أقل من 450 msec لو بدأت تزيد بدل ما كانت أقل من 450 بقت 500 ملي ثانية يبقى دا اسمه prolonged QT interval ،، دا يخليك consider إنك توقف الكاليترا و ال dose بتاع الهيدروكسي الكلوروكين  
أو لو زادت أكثر من ستين ملي ثانية عن اللي إنت كنت متابعتها يبقى إنت توقف الكاليترا وتقلل جرعة الهيدروكسي كلوروكين

**بالنسبة للميتونورم في ال GIT upset ؟؟**

مفیش مانع لو كان عندنا GIT upset ممكن نديه ،، وطبعاً ال diarrhea ممكن نديها anti diarrheal agents  
كل الأدوية اللي هي مضادة للإسهال ممكن نحطها زي الستربتوكين والانتينال والفلاجيل

**يا دكتور أنا قولتلك أنا عندي كورونا وبطني متبهدة أخذ إيه؟؟**

يمكن نأخذ ستربتوكين قرصين كل ٦ ساعات وبعد كذا قرص كل ٦ ساعات ومفيش مانع نعمل سونار على البطن

**سمعنا كلام عن ال Celebrex؟؟**

وأنا بردو سمعت كلام عنه ☺ ،، لكن لو هو بيريح وبيسكن الألام مفيش مانع نستخدمه

**هل يمكن استخدام حقن الاكتيمرا لمريض أنا عاملاله عزل منزلي وبيتابع معايا؟؟**

لو وصلت لأكتيمرا وهنديها في البيت ،، يبقى لازم العيان ده يكون في المستشفى ،، مش موافق إنه يأخدها في البيت

خدوا بالكم يا جماعة ،،

العامل النفسي مهم للمناعة ،، لازم تكون متظمن وواثق إن ربنا سبحانه وتعالى رحيم ورؤوف ،، لو فيه عدوى هتبان وهتأخذ علاج لو مفيش عدوى ومش هتبان يبقى عدت على خير

**إيه الأعراض الجلدية اللي بنشك فيها إنها كورونا؟؟**

الحقيقة يا جماعة أعراض الجلد ممكن تبقى في صورة بطش زرقا أو حمرا ،، بس مش بتاعت الكليكسان لا ،، دي في الأطراف ( اللي هي peripheral thrombotic attacks )

**مخالط لحالة ايجابي في البيت يفضل معزول لحد إمتى وفيه تكسير في الجسم وال CT free؟؟**

لحد ما السخونية والتكسير يختفوا ،، وتضيف عليهم 4 أيام

**المخالط بيطهر عليه أعراض بعد أد إيه؟؟**

من أربعة ل 21 يوم

**ال duration of oral anti coagulant؟؟**

زي ما اتفقنا من 3 أسابيع لشهر ونص ،، ومن تلت شهور لست شهور إذا كان عنده جلطات سابقة

**مين الأقوى الأزيثروميسين ولا الكلاريثروميسين؟؟**

بحق ربنا ،، الكلاريثروميسين علطول

الأزيثروميسين كان جه عليه وقت من الأوقات وقولنا عليه ضعيف جداً و resistance بتاعته فوق الخمسين في المية لأنه كان بيتصرف في نزلات البرد العادية

الكلاريثروميسين بييجيب نتائج أقوى وأعلى وميرتبطش كمان بالأكل ( مبتأخدوش على معدة فاضية )

**الإحتياطات الواجب اتخاذها وخاصة من المصلين كبار السن في أبسط صورة؟؟**

والله الإحتياط الأساسي إن الإنسان هياخد سجادة الصلاة معاه ويلبس الماسك الجراحي ويحافظ على مسافة بينه وبين اللي أدامه وممنوع يختلط مع مجموعة في زمن أكثر من خمس دقائق لحد ما ربنا سبحانه وتعالى يسهل والتكيفات يتمنع تشغيلها في المساجد ويكتفي بالمرآح في المساجد والكنائس لحد ما الدنيا تبقى كويسة ونبعد تماماً عن خطر العدوى ،، وإن كان التكيفات بيتكلموا عليها إنها غير ناقلة للعدوى لكن الكلام ده مش مؤكد بنسبة مية في المية

**مريض كورونا عنده 35 سنة من شهر شعر بتكسير الجسم وضياح حاسة الشم والتذوق ومن بعد ال 15 يوم اتحسن ومفيش أعراض ،، هل**

**عدم السخونية معناها ضعف المناعة؟؟**

لا ،،

### عايز أعرف الكوفيد ممكن يجي ب neurological symptoms؟؟

أه ممكن يجي ،، يجي بهبوط وتنميل وقلة كلام ،، بس مشوفناش حد بيقول كلامه خالص العيان كلهم كلامهم كثير كثير كثير قلة الكلام دي معترض عليها

### أفضل مكان نعمل فيها antibody titer؟؟

لا أجب ،، متعملوش ،، حتى الآن كله مش معتمد عليه بصورة سليمة

### النظام الغذائي وغط الحياة للطبيب المتعافي من كوفيد؟؟

يا عم الرئيس زي ما بيقولوا في الأمثال ،، طبعاً مش قصدنا على الدكتور قصدنا على أي عيان مرض ،، هو القرد بعد ما بيتسخط بيبقى قرد بردو إنت بعد ما جالك عدوى هتبقى إيه ثاني؟؟ ليس تشببها يعني بالقرد هيسخطوك يا قرد هيبقى إيه؟؟ ولا حاجة إنت خلاص جالك كورونا؟؟ هيجيلك إيه ثاني أكثر من كذا ،، ال Post viral symptoms اتفقنا عليها اللي هو هتنام كويس وتأكل كويس وهتشرب كويس وهتأخذ مسكنات بصورة جيدة

### كورونا وجاية بمغص الشديد والإسهال؟؟

دا بيطمنا إن الكورونا واخدة الجهاز الهضمي أكثر من الجهاز التنفسي ومع الوقت ومع العلاج اللي هو الأعراض المغص يأخذ له دواء اللي هو مضاد للتقلصات والإسهال الستربتوكين كويس أوي قرصين كل ثمن ساعات ومسكنات إن احتاج الأمر والأمور بتعدي على خير بإذن الله ،، وممكن نخط حاجة زي الينزوليد أو الأزيثروميسين أو الكلاريثروميسين ومعانا فيتامين سي والزنك طبعاً

### مفيش أعراض وإيجاي وبقاله 14 يوم؟؟

نفك العزل خلص الكلام

### الجلوكوفاج بيتعارض مع الكورونا؟؟

لا مبيتعارضش

### لو فيه سخونية وتكسير في الجسم وكنت مخالط أفضل معزول لحد إمتي؟؟

لحد السخونية والتكسير يروحوا بالذات السخونية بعديها بأربع أيام ممكن تنزل

### Pulmonary embolism هل ممكن تكون ال Only presentation؟؟

ممكن ،، الفيروس دا خبيث ومكار يا جماعة ،، ومن ضمن خبثه ومكره إنك مبتقدرش تتوقع هيجي بأهني صورة

### الهيدروكسي كلوروكين بيعمل Toxic myocarditis؟؟

بيعملش toxic myocarditis ،، الهيدروكسي كلوروكين بيعمل Prolongation of the QT interval لكن ،،

لو فيه Hypersensitivity منه ممكن نوقفه

ندعو إن ربنا سبحانه وتعالى إنه يرفع عننا هذا الوباء قريباً ويحفظ مصر ويحفظ العالم ويعيد الأمن والأمان والسلامة على جميع أنحاء العالم وإن كل الناس تستمتع بحياتها الطبيعية

ونشكر ربنا سبحانه وتعالى على ما من به علينا من فضل وندعوا بالرحمة لأصدقائنا من الأطباء والمرضى والممرضين ومن عمال الأمن والنظافة  
التي أصيبوا واستشهدوا في هذا الوباء  
ندعوا ربنا سبحانه وتعالى أن يجعل مع كل محنة منحة وربنا سبحانه وتعالى يكافئنا على جهدنا وعلى صبرنا وعلى مرضنا وعلى استشهادنا  
وربنا سبحانه وتعالى دايماً يبيتلى الإنسان عشان يخرج أفضل ما فيه

لله الحمد والمنة والثناء الحسن

تم الإنتهاء من تفريغ المحاضرة بتاريخ 4 يوليو 2020 الساعة الرابعة و 16 دقيقة فجراً  
وعذراً لو فيه خطأ غير مقصود

The excellence of this tafreegh does not only lie in its simple read, understand and recall way,  
but in the fact that it was written with the love of giving and passing knowledge. Graciously  
accept this tafreegh, for as we can only give ourselves by giving away to others.

لمزيد من المواد المفرة  
على الفيس بوك  
صفحة تفريغ المواد الطبية

 /dr.tafreegh

[www.facebook.com/dr.tafreegh3](http://www.facebook.com/dr.tafreegh3)

نحبكم في الله  
إذا عجبك أي شيء متفرغ تابع لصفحة أو جروب  
تفريغ المواد الطبية  
وحبيت حضرتك تنقله اتفضل  
بذكر المصدر أو بدون  
المهم إن المعلومة توصل لغيرك  
واحتسب إنك بتوصل معلومة لغيرك  
وإن شاء الله لك من الأجر الكثير بإذن الله  
ويكون في خدمة الإسلام  
ويكون سبب في علاج مريض باختلاف اسمه أو جنسه أو دينه  
اللهم اجعل عملنا خالصاً لوجهك الكريم  
اللهم آمين  
سلام بقا ☺